

MB: Belum muktamad

8 Exco Pahang jumpa PM

KUALA LUMPUR, Isnin — Perdana Menteri, Datuk Seri Dr. Mahathir Mohamad belum lagi membuat sebarang keputusan muktamad mengenai kedudukan Menteri Besar Pahang atau pun pemangkuannya.

Sumber-sumber Jabatan Perdana Menteri mengesahkan, Datuk Seri Dr. Mahathir memang mengadakan pertemuan hati ke hati dengan lapan anggota Exco Pahang lebih kurang sejam pagi ini.

Bagaimanapun, tambah sumber-sumber tersebut, pertemuan itu merupakan perkara biasa untuk membolehkan Perdana Menteri meninjau lebih lanjut terhadap perkembangan politik semasa di Pahang.

Anggota Exco yang hadir di pertemuan itu ialah Datuk Haji Abdul Hashid Abdul Rahman (Pengerusi Jawatankuasa Perumahan dan Ahli Dewan Undangan Negeri Paya Besar), Haji Abdul Razak Haji Hitam (Pengerusi Jawatankuasa Penyelarasan Badan-badan Awam dan ADUN Batu Talam), Haji Idris Long (Pengerusi Jawatankuasa Kerajaan Tempatan dan ADUN Temerloh);

Encik Mohd. Zuki Kamaluddin (Pengerusi Jawatankuasa Pembangunan Pertanian dan ADUN Bentan), Encik Abdul Latiff Kantan (Pengerusi Jawatankuasa Kebudayaan, Belia dan Sukan dan ADUN Rompin);

Encik Harun Jaafar (Pengerusi Jawatankuasa Pembangunan Masyarakat dan ADUN Tahan), Encik Ngau Boon Min (Pengerusi Jawatankuasa

Penyelarasan Kemajuan Perkampungan dan ADUN Karak) dan Encik Lim Ah Lek (Pengerusi Jawatankuasa Kemudahan Asas dan ADUN Kuantan).

Menteri Besar, Haji Abdul Rahim Abu Bakar tidak menyertai delegasi Exco itu. Beliau dijangka menemui Datuk Seri Dr. Mahathir di satu perjumpaan berasingan minggu ini.

Datuk Seri Dr. Mahathir merangkap Pengerusi Perhubungan UMNO Pahang, memanggil kelapan Exco itu sekadar untuk bertukar-tukar fikiran dan pendapat mengenai keadaan politik di negeri tersebut sekarang.

Hakikat

Sumber-sumber Jabatan Perdana Menteri berkata, adalah menjadi perkara biasa untuk Perdana Menteri memanggil pemimpin kerajaan negeri bila sesuatu perkembangan berlaku.

"Perdana Menteri tidak langsung mengambil keputusan sama ada mengenai pemergian Haji Rahim sebagai seorang delegasi Malaysia ke Perhimpunan Agung Bangsa-bangsa Bersatu di New York yang berjalan sekarang, atau pun mengenai siapa pemangku Menteri Besar sewaktu Haji Rahim di luar negeri," tambah sumber-sumber itu lagi.

Bahan asal dari Arkib
Negara Malaysia